



Statut o izmjenama i dopunama Statuta JP Elektroprivreda BiH d.d. – Sarajevo je objavljen dana 26.08.2015. godine na oglasnoj ploči u sjedištu Društva

STATUT
o izmjenama i dopunama Statuta Javnog preduzeća
Elektroprivreda Bosne i Hercegovine d.d. - Sarajevo

avgust 2015. godine

Na osnovu članova 123. i 246. Zakona o privrednim društvima („Službene novine Federacije Bosne i Hercegovine“, broj: 23/99, 45/00, 2/02, 29/03, 68/05, 91/07, 84/08, 7/09, 63/10 i 75/13) i člana 57. stav 1. tačka 7. Statuta Javnog preduzeća Elektroprivreda Bosne i Hercegovine d.d. – Sarajevo – prečišćeni tekst, broj: SD-1067/11-19/3b), od 09.03.2011. godine, broj: SD-28363/11-23/2, od 24.11.2011. godine i broj: SD-7863/12-25/2, od 20.04.2012. godine, a u vezi sa članom 24. Uredbe o vršenju ovlaštenja u privrednim društvima sa učešćem državnog kapitala iz nadležnosti Federacije Bosne i Hercegovine („Službene novine Federacije Bosne i Hercegovine“, broj: 44/15), Trideset i šesta Skupština Javnog preduzeća Elektroprivreda Bosne i Hercegovine d.d. – Sarajevo, održana dana 26.08.2015. godine donosi

Statut o izmjenama i dopunama Statuta Javnog preduzeća Elektroprivreda Bosne i Hercegovine d.d. - Sarajevo

Član 1.

Član 76. Statuta Javnog preduzeća Elektroprivreda Bosne i Hercegovine d.d. – Sarajevo – prečišćeni tekst, broj: SD-1067/11-19/3b), od 09.03.2011. godine, broj: SD-28363/11-23/2, od 24.11.2011. godine i broj: SD-7863/12-25/2, od 20.04.2012. godine mijenja se i glasi:

“Član 76.

„Postupak izbora kandidata za članove Uprave - Generalnog direktora i izvršne direktore provodi Nadzorni odbor na osnovu javnog konkursa iz reda kandidata koji po menadžerskim znanjima i iskustvu najbolje odgovaraju za izvršenje operativnih i poslovnih potreba Društva.

Nadzorni odbor donosi odluku o imenovanju Komisije za provođenje konkursa za izbor članova Uprave - Generalnog direktora i izvršnih direktora kojom utvrđuje sastav i način rada Komisije.

Komisija iz stava 2. ovog člana vrši postupak provjere blagovremenosti i potpunosti dostavljene dokumentacije, ispunjavanja propisanih uslova, te druge pripremne aktivnosti za izbor kandidata za članove Uprave - Generalnog direktora i izvršne direktore, predviđene odlukom iz stava 2. ovog člana, te dostavlja izvještaj o provedenim aktivnostima Nadzornom odboru.

Nadzorni odbor na osnovu izvještaja Komisije iz stava 3. ovog člana utvrđuje listu kandidata koji ispunjavaju propisane uslove za članove Uprave - Generalnog direktora i izvršne direktore.

Nadzorni odbor listu kandidata koji ispunjavaju propisane uslove za članove Uprave - Generalnog direktora i izvršne direktore, zajedno sa zapisnikom koji sadrži sve aktivnosti i radnje obavljene od strane Komisije iz stava 2. ovog člana, dostavlja na izbor i nominovanje u skladu sa aktom Vlade Federacije Bosne i Hercegovine.

Na osnovu liste kandidata iz stava 5. ovog člana, Vlada Federacije Bosne i Hercegovine donosi Odluku o davanju prethodne saglasnosti Nadzornom odboru za imenovanje članova Uprave.

Nadzorni odbor imenuje članove Uprave - Generalnog direktora i izvršne direktore za koje je data prethodna saglasnost iz stava 6. ovog člana.

Ukoliko kandidati za članove Uprave - Generalnog direktora i izvršne direktore, svi ili pojedinačno, ne dobiju prethodnu saglasnost, Nadzorni odbor će:

- 1. raspisati javni konkurs za izbor članova Uprave za koje nije dobijena saglasnost i ponovo provesti postupak propisan ovim članom i*
- 2. imenovati vršioca dužnosti Generalnog direktora, odnosno izvršnog direktora u skladu sa članom 86. ovog Statuta.“*

Član 2.

Član 77. mijenja se i glasi:

„Član 77

Za Generalnog direktora i izvršne direktore može biti imenovano lice koje ispunjava slijedeće uslove:

- a) da ima visoku stručnu spremu, tehničke ili ekonomske ili pravne struke i*
- b) da ima iskustvo i stručnost u oblastima od značaja za rad i poslovanje Društva.*

Konkretni uslovi za članove Uprave utvrdit će se Pravilnikom o organizaciji Društva.

Za Generalnog direktora i izvršne direktore ne može biti imenovano lice ako obavlja funkciju koja je nespojiva sa funkcijom Generalnog direktora i izvršnih direktora ili ako vrši funkciju u političkim strankama.

Mandat članovima Uprave je četiri godine, i na istu funkciju mogu biti ponovo birani.

Mandat Generalnog direktora i ostalih članova Uprave-izvršnih direktora počinje teći istovremeno, što će se konstatovati posebnim aktom Nadzornog odbora Društva.

Izuzetno, u slučaju iz stava 8. prethodnog člana izbor se vrši do kraja mandata Uprave konstatovanog posebnim aktom iz stava 5. ovog člana.

Članovima Uprave - Generalnom direktoru i izvršnim direktorima koji su imenovani umjesto razrješenog člana Uprave, u slučaju kada se ne razrješava cijela Uprava, mandat traje do isteka mandata članova Uprave koji su imenovani prilikom imenovanja cijele Uprave, a nisu razrješeni.

Položaj, ovlaštenja, prava i odgovornosti Generalnog direktora uređuje se ugovorom između Nadzornog odbora i Generalnog direktora u skladu sa odredbama ovog Statuta.

Položaj, ovlaštenja, prava i odgovornosti izvršnih direktora uređuje se, u skladu sa odredbama ovog Statuta, ugovorom između Generalnog direktora i izvršnih direktora uz prethodno odobrenje nadzornog odbora.“



Član 3.

Član 86. mijenja se i glasi:

„Član 86.

Izuzetno, bez provođenja postupka iz člana 76. ovog Statuta Nadzorni odbor može imenovati vršioca dužnosti člana Uprave do okončanja konkursne procedure, a najduže na vremenski period do šest mjeseci, počev od dana stupanja na snagu Odluke o imenovanju.

Za imenovanje vršioca dužnost člana Uprave potrebna je prethodna saglasnost u skladu sa aktom Vlade Federacije BiH.“

Član 4.

Ovaj Statut stupa na snagu osmog dana od dana objavljivanja na oglasnoj ploči Društva.

Broj: SD - 22466/15 - 36/2.
Sarajevo, 26.08.2015. godine

